

七里高厚遶隰廼疆廼理其爲縣也錢唐置號以  
華信出私錢而築塘餘杭立名因秦皇捨舟航而  
登陸於潛鹽官始自漢家臨安富陽更由晉室孫  
吳分富春而翔新城之邑我宋以仁和而易錢江  
之目南新立當淳化之年昌化改在太平興國或  
爲繁或爲望或爲中或爲上其爲鄉爲里制名取  
義亦各有所因焉如曰七賢因覩僊客如曰新登  
因更縣額若茲之類有所因而名鄉者又如云勲  
貴因命錢鏐如云白雀因見白雀若茲之類有所  
因而名里者也生齒居聚畜牧養蕃有場有圃有  
廬有園有桑有梓有林有泉爨煙相望雞犬相聞  
隱隱振振繚垣綿聯櫛秀菰穗象耕鳥耘賽華薌  
之重秬散漭臯之香杭俗享再稔之利婦蠶八育  
之綿家蓄鶴膝之器戶銜犀渠之精出入足以相  
友調救足以相生閑暇足以相樂急難足以相存  
頒白不負戴於道幼疾各得所而安吳地舊俗歷  
世仍傳尊釋氏以崇奉習巫覡以相先故蓮宮紛  
置五百三十有二而祠廟建立一百七十有三其